

Dave & Marlene Rempel

Unjahoolungen Äwa De Ehe

Hauntbuak



Dave & Marlene Rempel

Unjahoolungen Äwa De Ehe

Hauntbuak

Enhault

Lekzion 1	
Eene Scheene Ehe	2
Lekzion 2	
Veschieden	4
Lekzion 3	
Leewen & Achten Poat 1	6
Lekzion 4	
Leewen & Achten Poat 2	9
Lekzion 5	
Leiden & Unjadon Sennen Poat 1	12
Lekzion 6	
Leiden & Unjadon Sennen Poat 2	15
Lekzion 7	
Vejäwen	19
Lekzion 8	
Kjarpa	24
Lekzion 9	
Jesunde Seel	31
Lekzion 10	
Daut Ieeschte	38
Lekzion 11	
Help Von Gott	42
Lekzion 12	
Deenen	44

Eene Scheene Ehe

1. Waut ons scheen jeit enne Ehe:

- a. Aule Dach met mien basta Frint toop sennen.
- b. Aule Nacht met mien basta Frint toop schloopen gonen un zemorjes met mien basta Frint toop oppstonen.
- c. Toop reisen
- d. Toop schaufen
- e. Dautselwje Ziel haben; dautselwje Läden; deeselwje Dreem fa onse Tookunft.
- f. Onse Freid deelen met eenaunda.
- g. De enje Jemeenschoft waut wie haben.
- h. Daut Vetruen waut doa tweschen ons es.

2. Daut es mäajlich eene scheene Ehe to haben.

3. Eene scheene Ehe to haben brukt Oabeit.

- a. Wan du eene goode Ehe sitst, doa es jeschaufft worden.

4. Twee Probleemen enne Ehe

- a. Wie weeten waut wie doonen sullen, oba wie sent nich wellich dee Tiet, Kraufft, un Oabeit doanenn to jäwen, waut doa fällt.
 - i. Daut brukt eene däachliche Aunstrenjunk.
 - ii. „Jie motten oba uk doonen waut daut Wuat sajcht, wiels bloos hieren, rieekjt nich too, sest beschummel jie junt selfst.“ Jakobus 1:22
- b. Wie weeten nich woo.
 - i. „Mien Volkj es to nuscht jeworden, wiels dee nich belieet sent.“ Hosea 4:6
 - ii. „Dan woa jie weeten waut Woarheit es, un de Woarheit woat junt frie moaken.“ Johanes 8:32

5. Ons Jebäd:

- a. Daut jie no jieda Klauss woaren kjennen en Leew von dee Dinj räden, waut hee wudd kjennen doonen, uk waut see wudd kjennen doonen, toom june Ehe bäta moaken.
- b. Daut jie de Woarheit seenen woaren, dee junt frie moaken woat. Daut jieda schwoare Ehe woat scheen woaren un daut jieda scheene Ehe woat scheena woaren.

Veschieden

„Un wautemma see junt doonen sellen, daut doot jie an uk.
Daut es waut daut Jesaz un de Profeeten lieren.“
Matäus 7:12

1. **Mana un Frues sent veschieden.**
 - a. Frues un Mana buen veschieden Veheltnisen.
 - b. Frues un Mana denkjen veschieden.
2. **Veschiedne Perseenlichkjeiten (Temperamenten)**
 - a. Sangienisch
 - i. Haft de Gow met Menschen omtogonen
 - b. Kolerisch
 - i. Stoakja Leida
 - c. Melankolisch
 - i. Sea ordentlich
 - d. Flagmatisch
 - i. Toofräd
3. **Veschiedne Leew Sproaken**
 - a. Tiet nämen
 - b. Toostemmende Wieed sajen
 - c. Bedeenen
 - d. Aunfoten
 - e. Jeschenkja jäwen

De Jefoa

1. **Selftsechtichkjeit**
 - a. Du jleefst du kaust nich endren.
 - b. Du jleefst Menschen motten die soo aunnämen aus du best.
 - c. Dien Poatna mott die doano behandlen aus du best.
2. **Bruck dise Dinj, toom dien Poatna kjanen lieren.**
 - a. Du sitst, daut dän daut schwoa es to endren.
 - b. Du nemst dän aun, soo aus dee es.
 - c. Du behandelst dän doano, aus dee daut jleicht.

**Dit but de Ehe, daut jie junt lieren to vestonen, un jie junt omzajcht Leew
bewiesen opp soon Wajch, daut jun Poatna sikj jeleeft feelt.**

Leewen & Achten Poat 1

„Oba aulemol, jie Mana sellen june Frues jrod soo goot sennen, aus junt selfst, un de Frues sellen soo sorjen, daut see äare Mana achten.“ Efeesa 5:33

1. Leewen un Achten

- a. Ar fält Leew; am fält Respakjt.
 - i. Fru, weetst du woosoo jie soo vël mol em Striet komen, ooda woosoo hee sikj bloos wajch dreit von die, ennestäd daut hee wellich es daut derch to räden? Wäajen waut du deist ooda sajchst, moakt am soo feelen, du kjikjst rauf opp am; un daut moakt am soone Dinj doonen, de sikj die leefloos feelen.
 - ii. Maun, weetst du woosoo diene Fru doll woat un die kjritisieet? Wäajen see felt diene Leew nich, un ar fält de Leew, daut see sikj kaun secha feelen. Dit moakt ar soone Dinj doonen, waut sikj die respakjtloos feelen.
 - iii. Fru, wan du siene Oabeit, siene Leidaschoft, ooda irjent sestwaut von am kjritisieescht, dan woat hee
 - . die weinja leewen.
 - . oaja woaren, ennestäd bätä.
 - . Wan dien Ziel es sien schljachtet to vebätren, dan woat hee no daut schljachtet dreien, un sien goodet woat wieda un wieda verschwinjen.
 - . Wan dien Ziel opp daut es, waut du respakjten kaust von am, dan woat hee no daut goodet dreien, un daut schljachtet woat wieda un wieda verschwinjen.
 - iv. Maun, wan see die kjritisieet ooda doll rät, dan sieekjt äa Hoat no Leew; wan du dan woascht dichtbie komen, jäajen Stroom schwamen, un ar bloos Leew bewiesen, woascht du die wundren, äwa woo daut endren woat.

Dit es waut wie meenen met schwoare Oabeit. Leew bewiesen wan see respakjtloos es, es schwoa. Respakjtvoll sennen wan hee leefloos es, es schwoa.

De Maun:

1. Waut es respakjtloos to eenen Maun?

- a. Ver de Kjinja ooda ver aundre Menschen schljacht räden von am ooda to am.
- b. Am kjliene Eenzelheiten enne Vetal utbätren. De Eenzelheiten moaken jew-eenlich kjeen Unjascheet en waut hee prooft to vetalen.
 - i. "Daut wia Dingsdach, nich Medwäakj."
 - ii. "Nä, hee wia dan 4 Joa oolt, nich 6."
- c. Am utbätren, un besondasch ver aundre Menschen.
 - i. Wan daut fält, dan räd tus auleen un respakjtvoll met am.
- d. Wan hee von die soo feelt hee kaun nich jenuach Jelt moaken fa die.
- e. Entscheidunjen moaken onen am metenn nämen (enne Famielje).
 - i. Hee prooft to lieren; Respakjt am, un näm am metenn.
- f. Nich Sex wellen.
- g. Irjentwaut, waut am moakt feelen, ekj kjikj rauf opp am, ennestäd nohecht no am.
 - i. Dit es nich waut Grootschet, dit es een Bederfnis.
 - ii. Wan wie de Mana grootsch nanen, wäajen äant daut aun Respakjt fält, kjennen see ons selftsechtich nanen, wäajen ons daut aun Leew fält.
- h. Gott haft Mana soo jemoakt. Aus Gott säd, "Daut es nich goot, daut de Mensch auleen es," dan sach Hee daut aul, daut de Maun daut aun wäm fäld, de oppkjikjen wudd no am.

2. Waut kaust du doonen?

- a. Räd von dee Dinj, wuamet du die werkjlich brow deist.
- b. Em Jelt, toopoabeiden; nich mea brucken aus hee vedeent.
- c. Näm am metenn, en däachliche Entscheidungen.
- d. Driew am to Sex.
- e. Räd väl von dee Dinj, dee du von am respakjtst.
 - i. Mea aus du jleefst daut doa needich es.
- f. Wan du motst von empfindelje Dinj räden, doo daut respakjtvoll.
- g. Sieekj en diene Jedanken no dee Dinj, dee du von am respakjtst.
- h. Nich bloos weinich doavon räden, waut du nich jleichst, oba weinich do-aräwa denkjen.

Leewen & Achten Poat 2

„Oba aulemol, jie Mana sellen june Frues jrod soo goot sennen, aus junt selfst, un de Frues sellen soo sorjen, daut see ääre Mana achten.“ Efeesa 5:33

De Fru:

1. Waut es leefloos to ne Fru?

- a. Nich wellen räden.
- b. Nich wellich sennen to sajen, daut die waut leet deit.
- c. Nich Tiet haben to horchen.
- d. Nich Tiet haben fa de Dinj waut ar wichtich sent:
 - i. Kjinja
 - ii. Deenst
 - iii. Interessen

2. Waut kaust du doonen?

- a. Tiet nämen
- b. Interessen wiesen
- c. Horchen
- d. Vetalen
 - i. Tiet haben toom horchen. Soo sea, daut du wellich best daut Foon auntsied to lajen, ar enne Uagen to kjikjen, un to horchen.
 - ii. Vetalen woo die daut jeit un waut du schaufst. Daut moakt de Fru feelen, dit es jun Läwen toop. Wan du nuscht von diene Oabeit rätst, dan feelt ne Fru sikj leicht no eene Kjääkjsche, ennestäd no een Frint.
- e. Famielje Tiet.
 - i. Wan du june Kjinja leefst, dan feelt de Fru soo du leefst ar.

3. Wää woat aunfangen?

- a. “Wan see/hee bloos wudd, dan wudd ekj uk.”
 - i. Deejanja waut doa well ne bätte Ehe haben.
 - ii. Grulst du die, dee aundra woat nich endren, wan du aunfangen woascht? Daut es ziemlich secha, daut dee woat.

„Jie Kjnajchts, jehorcht june Wieetslied un deent an met Forcht un Zetren, opp lernst von Hoaten, soo aus wan jie Christus selfst deenden. Oba deent nich bloos dan goot, wan de Wieet siene Uagen äwa junt haft. Deent soo aus wan jie Christus Siene Deena wieren. Doot jewessenhaut daut, waut jie jleewen, daut Gott jefaulen wudd. Dit sell jie weeten: Daut Goode, waut jie doonen, woat de Har junt beloonen, eendoont auf jie Sklowen ooda freee Menschen sent.“
Efeesa 6:5-8

„Wan jie dee goot sent, dee junt goot sent, woo kjenn jie met eenen Loon räakjnen, wiels daut doonen soogoa de Takskollakjta. Un wan jie bloos june Frind frintlich bejreessen, waut doo jie mea aus aundre? Daut doonen soogoa de Takskollakjta. Oba jie motten volkomen sennen, jrod soo aus jun Voda em Himmel volkomen es.“ Matäus 5:46-48

„Un jrod soo jie Maunslied, got veninftich om met june Frues, daut june Jebäda nich vehindat woaren, un denkjt doaraun daut see schwaka sent, un daut see jrod soo goot Aundeel aun de Jnod un daut eewje Läwen haben.“ 1. Petrus 3:7

Dien Loon!

1. De Loon em Himmel

- a. Wan du die aunstrenjst, oba du sitst kjeene Endanis en dien Poatna, dan bliew biem die aunstrenjen. Du kjrichst een Loon em Himmel.

2. De Endanis enne Ehe

- a. Fang aun dien Poatna met Leew un Respakjt to behaundlen, aus dee daut vedeent haft ooda nich.
- b. Ziemlich secha woascht du ne Endanis seenen. Ne goode Endanis!
- c. DU WOASCHT DAUT JLEICHEN!
- d. Daut woat die Moot jäwen bloos wieda soo to doonen!
 - i. Un sooväl dolla du dien Poatna leefst un respakjst, sooväl dolla woat dee endren!
 - ii. Un du woascht daut sooväl dolla jleichen!
 - iii. Un daut Raut woat aunfangen to dreien.
 - . Leew jäwen! Leew nämen! Leew jäwen! Leew nämen! Leew jäwen...

Leiden & Unjadon Sennen Poat 1

„Un jie Frues, siet june Mana soo unjadon, aus jie däm Harn sent. Wiels de Maun steit äwa siene Fru, soo aus Christus äwa Siene Jemeent steit, fa dee Hee Sikj selfst hanjeef äa Heilant to sennen. Un soo aus de Jemeent Christus unjadon es, soo sellen de Frues en aules äare Mana unjadon sennen. Mana, siet june Frues jrod soo goot, aus Christus Siene Jemeent goot wia, un Sikj selfst fa ar hanjäwen deed, daut Hee ar heiljen kunn, aus Hee ar ieescht met däm Wuat soo aus met Wota, jewoschen haud, daut dee en Siene Uagen nich plakich ooda veknutscht, oba heilich un oschuldich wia. Soo sellen uk de Mana äare Frues jrod soo goot sennen aus äaren ieejnen Kjarpa. Wäa siene Fru goot es, es sikj selfst goot.“

Efeesa 5:22-28

1. Mana, waut meent daut, daut de Maun äwa siene Fru steit?

- Meent daut, see es sien Sklow?
- Meent daut, hee saul väasajen?
- Meent daut, hee es hecha aunjeseenen?
- Meent daut, hee saul ar belieren?
- Meent daut, hee saul ar unja Kontroll hoolen?

Daut meent: **AUNLEIDEN, BESCHITZEN, VESORJEN, UN SCHAZEN.**

Aunleiden

„Nämt mie toom Biespel, soo aus ekj Christus toom Biespel näm!“ 1. Korinta 11:1

- Moak secha, daut du soon Läwen läfst, waut see folgen kaun, un daut du op best, daut see hinjaraun komen kaun.
- Diene Oabeit es auntoleiden; diene Oabeit es nich doano to seenen, daut diene Fru woat hinjaraun komen.

Beschizen

- Jesus jeef Sikj selfst fa Siene Brut.
 - Du best beroopen, dieselfst fa diene Brut to jäwen.
- Beschitz äare Jefeelen.
- Näm äare Schult opp die.
- Beschitz ar von dien Oaja.
 - „Un jrod soo jie Maunslied, got veninftich om met june Frues, daut june Jebäda nich vehindat woaren, un denkjt doaraun daut see schwaka sent, un daut see jrod soo goot Aundeel aun de Jnod un daut eewje Läwen haben.“ 1. Petrus 3:7
 - Bräakj nich äa Hoat met dien Oaja.

Vesorjen

- a. Wautemma ar fält:
 - i. Jelt
 - ii. Waut de Kjinja fält
 - iii. Leew
- b. Du kaust nich aule äare Bederfnisen erfellen. See haft Bederfnisen, dee bloos Gott fellen kaun. Oba du best dee Persoon, dee beroopen es, soo fäl aus mäajlich fa ar to erfellen, un die met Gott tooptoschluten en aules waut die fa ar fält.

Schazen

- a. Leew ar.
 - i. „Mana, siet june Frues jrod soo goot, aus Christus Siene Jemeent goot wia, un Sikj selfst fa ar hanjäwen deed,” Efeesa 5:25
- b. Erjaz die aun ar (soo aus see es)
 - i. „Straum un leeftolich aus een Ree, lot äa liebkoosen die jlekjlich moaken, lot ar met äare Leew om die sennen.“ Spricha 5:19
- c. Low ar
 - i. „Äare Kjinja stonen opp un säajnen ar, un soo uk äa Maun; hee loft ar. „Väle Frues haben goot jedonen, oba du steist äwa an aula,” sajcht äa Maun.“ Spricha 31:28-29
- d. Häw ar opp; moak ar fein loten ver Menschen.
 - i. Gott kaun äare Gowen en Sien Rikj väl bäta brucken, wan du ar opphäfst un ar Moot toosprakjst.
- e. Erkjan waut fa een Schauz du hast.
 - i. „Wäa eene Fru finjt, finjt waut goodet, un es vom Harn jesäajent.“ Spr. 18:22

Bemoakjungen:

Leiden & Unjadon Sennen Poat 2

„Un jie Frues, siet june Mana soo unjadon, aus jie däm Harn sent. Wiels de Maun steit äwa siene Fru, soo aus Christus äwa Siene Jemeent steit, fa dee Hee Sikj selfst hanjeef äa Heilant to sennen. Un soo aus de Jemeent Christus unjadon es, soo sellen de Frues en aules äare Mana unjadon sennen. Mana, siet june Frues jrod soo goot, aus Christus Siene Jemeent goot wia, un Sikj selfst fa ar hanjäwen deed, daut Hee ar heiljen kunn, aus Hee ar ieescht met däm Wuat soo aus met Wota, jewoschen haud, daut dee en Siene Uagen nich plakich ooda veknutscht, oba heilich un oschuldich wia. Soo sellen uk de Mana äare Frues jrod soo goot sennen aus äaren ieejnen Kjarpa. Wäa siene Fru goot es, es sikj selfst goot.“

Efeesa 5:22-28

1. Frues, waut meent unjadon sennen?

- a. Meent daut, de Maun saul doano seenen, daut wie woaren unjadon sennen?
- b. Meent daut, de Maun kaun ons mandren?
- c. Meent daut, wie motten bloos jo sajen un stell sennen, eendoont waut?
- d. Ooda wia dit bloos fa jane Tiet?
 - i. De twee Growes wua wie nenjerutscht sent:
 - . De Maun es mea wieet aus de Fru.
 - . De Fru es mea wieet aus de Maun.

2. Gott haft ons veschieden jemoakt, wäjjen Hee veschiedne Oppgowen jeplont haud fa ons.

- a. Een jiedra es schuldich siene Oppgow to erfellen.
- b. Dan sent wie beid aum mootichsten un aum basten to brucken.

3. Dän Maun siene Oppgow es: Aunleiden, Beschitzen, Vesorjen un Schazen.

- a. Hee es beroopen, daut schwanste Poat von daut Ehe Veheltnis to droagen.
 - i. Es daut nich bloos rajcht von Gott, daut Hee daut fa de Mana dan daut besje leichta moakt, daut Hee aun ons Frues bestalt, wie sellen ons unjadon hanstalen?
- b. Gott haft dien Maun de Oppgow jejäft,
 - i. Die auntoleiden.
 - ii. Die to beschitzen met sien ieejnet Läwen.
 - iii. Die to vesorjen met waut die fält.
 - iv. Die to schazen.
 - . Es daut dan nich gaunz rajcht, daut Hee aun die bestalen wudd, die doarunja to stalen met een dankboaret Hoat?
 - . Woo kaun de Maun siene Oppgow ver Gott utfellen, wan wie bloos grootsch sent un sajen, “Ekj woa soo aus ekj well. Du hast mie nuscht to sajen.”?

4. Waut es unjadon sennen?

- a. Daut jratste es am huach achten.
 - i. Met Respakjt aun am denkjen.
 - ii. Met Respakjt no am horchen.
 - iii. Met Respakjt to am räden.
 - iv. Aulawääjen am huach en Acht hoolen
 - . Ver de Kjinja
 - . Ver aundre Menschen
 - . Wan bloos jie beid toop sent
 - . Wan du auleen best
- b. Am unjastetten
 - i. Enne Oabeit
 - ii. Enne Famielje
 - iii. Em Kjinja belieren
 - iv. En siene Jemeenschoft met Gott

5. Waut nich to doonen:

- a. Mank staupen un sajen, „Nu woa ekj“.
- b. Am waut aufsajen.

Waut en veschiedne Loagen to doonen:

1. Waut wan hee waut plont to doonen waut die nich weis lat?

- a. Proow am opp een moot-toosprääkjenda un respakjtvolla Wajch to sajen, waut du denkjst ooda woo du die feelst doaräwa.

2. Waut wan du am aul jesajcht hast waut du denkjst, un hee deit daut dannoch?

- a. Proow am doawääjen Moot tootosprääkjen.

3. Waut wan hee rajcht wia, un daut haft jeschaufft?

- a. Jäw am dee Aunerkanunk.

4. Waut wan du rajcht wiescht, un daut haft nich jeschaufft?

- a. Sprääkj am Moot too.

5. Waut wan eena biejäwen mott?

- a. Wie Frues sullen leicht reed sennen toom biejäwen.

6. Waut wan mien Maun siene Oppgow von Gott nich nokjemt?

- a. De Bibel jeft ons nich Rum, daut wie dan nich brucken unjadon sennen.
 - i. Dee sajcht, wan wie ons respakjtvoll unja ons Maun stalen, wan de uk noch nich mol Gott jehorchen well, daut es vël mol de Schlätel woo Gott dan aun am naun kaun.

- . „Jrod soo uk jie Frues, siet june Mana unjadon, daut soone dee noch nich no Gott Sien Wuat horchen wellen, onen väl to sajen, kjennen jewonnen woaren,“ 1. Petrus 3:1
- . „Jie Kjnajchts, ieet june Haren un siet an unjadon, un nich mau de frintelje un leeftolje, oba uk de veschrowne un vedrisselje. Wiels daut es werkjlich Jnod, wan jie doawäajen lieden motten, daut jie een reinet Jewessen ver Gott hoolen wellen. Waut halpt junt daut wan jie jeduldich lieden, wan jie Strof vedeent haben? Oba, wan jie rajcht un goot doonen, un doafäa jestroft woaren, un dan jeduldich lieden, dan haft Gott Siene Freid aun junt. Dit es wuattoo Gott junt beroopen haft, wiels Christus uk fa junt jeläden haft un junt doarenn een Väabilt jeloten, daut jie en Siene Footspoaren gonen sellen. Jesus haud kjeene Sind jedonen, äwa Siene Leppen sent kjeene Lääjes jekomen; Hee schull niemols trigj wan see Am schullen, Hee dreiwd nich Rach to eewen wan Hee lieden must, Hee jeef Gott daut aun Haunt, Dee doa rajcht rechten woat. Jesus selfst neem onse Sinden opp Sien ieejen Kjarpa met opp däm Kjriez nopp, daut wie fa de Sind doot sent un fa de Jerajchtichkjeit Läwen kjennen; wiels derch Siene Wunden sent wie jeheelt worden. Wiels jie erden aus vebiestade Schop, oba jie haben junt nu oppjemoakt to dän Hoad, dee äwa june Seelen woakt.“ 1. Petrus 2:18-25
- . Dit rät to Oabeida, oba uk kjrakjt soo goot to Frues.

7. Waut wan mien Maun en groote Sind läft?

- a. Hee mesbrukt die ooda diene Kjinj
- b. Hee haft aundre Frues
 - i. Dan motst du Help sieekjen.
 - . 1. Korinta 7:12-13 sajcht: „To de äwaje saj ekj, nich de Har, wan een Brooda eene Fru haft, dee nich jleeft, un see oba wellich es, met am toop to läwen, saul hee ar nich wajch schekjen. Un wan eene Fru eenen Maun haft, dee nich jleeft, un hee oba wellich es, met ar toop to läwen, saul see äaren Maun nich wajch schekjen.“

Vejäwen

„Dan kjeem Petrus opp un säd: Har, woo foaken mott ekj mienen Brooda vejäwen, wan dee sikj aun mie vesindicht? Rieekjt säwen mol too? Jesus säd to am: Ekj saj die, nich mau säwen mol, oba 70 mol säwen mol.“ Matäus 18:21-22

1. Vejäwunk

- a. Näm die zemorjes aul vää, daut du hast am/ar aul aules vejäft waut passieren woat. Wan daut dan passieet, dan latst daut fuaz loos, un blifst mootich.
- b. Wan du die dit aunjewant hast, dan brukst du doa zemorjes nich mol aundenkjen. Du läfst aul soon Läwen, wua du leicht reed best toom bloos fuaz loos loten.
- c. Wan die leicht jieda Dinkj baudat, dan fang aun die daut zemorjes vää to nämen, un froag dän Heiljen Geist die to halpen, daut du jieda Dinkj aul vejäwen deist waut vondoag passieren woat, un go mootich em Dach nenn.
- d. Frei die fa jieda Dinkj waut du haustich vejäwen kaust, un loos loten kaust.

2. Vejäwen es een Muss, wan de Ehe schaufen saul.

- a. Wäajen wie aula Fäla moaken un Schwakheiten haben; dien Poatna woat Fäla moaken.
- b. Oba uk bloos eefach wäajen wie twee Menschen sent, met jieda een Vestaunt un wie denkjen noch mol veschieden.

3. Waut meent vejäwen?

- a. Loos loten
- b. Gott daut enne Henj jäwen

Läajes äwa Vejäwunk:

1. „Wie motten sajen, daut es aula goot waut jana jedonen haft?“

- a. „Woo woat dee daut doch gonen, waut sajen daut de Sind eendoont es, un daut daut goode schljacht es; dee waut sajen schwuat es witt un witt es schwuat; dee waut sajen daut Betre es seet un daut Seete es betta.“ Jesaja 5:20
- b. „Doot niemols Rach eewen, leewe Frind. Jäft Gott Sienen Oaja Rum doatoo; wiels daut steit jeschräwen: “Rach eewen es Miene Sach. Ekj woa trigjtolen, sajcht de Har.”“ Reema 12:19
- c. Wan du doll best äwa dien Poatna, dan kaust du nich jeloten kloa denkjen, toom unjascheeden woont goot un woont schljacht es.
 - i. Doawäajen brinj dieselfst ieescht unja Kontroll, un dan räd doavon to Gott, un froag Am, aus daut goodet wia ooda schljachtet?
 - ii. Wan daut schljachtet wia, dan jeff Gott daut, un vejät doavon.

2. “Wan ekj vejäft hab, woa ekj dan vejäten?”

- a. Vejäwen un vejäten sent twee veschiedne Dinj.
 - i. Vejäwen meent loos loten.
 - ii. Du woascht daut veleicht Läwestiet em Denkj hoolen, oba du best reed toom daut vejäten. Du hast Gott daut äwajäft.
- b. Wan die leicht eene List von Dinj biefaulen, von waut dien Poatna aules orra-jcht jedonen haft, dan schauf doamet, daut du daut loos loten kaust.
 - i. „Un stalt junt nich soo han aus dise Welt deit. Jie sellen derch june niee Jesennunk veendat woaren, daut jie weeten kjennen, waut Gott Sien Wel-len, waut goot, aunjenäm un volkomen es.“ Reema 12:2
- c. Sieekj no de goode Dinj von dien Poatna.

3. „Jana mott ieescht fa Vejäwunk froagen?”

- a. „Doot aules waut jie kjennen, wan daut mäajlich es, met aule Menschen Fräd to haben.“ Reema 12:18
 - i. Dit meent, du woascht fa Vejäwunk froagen wan du die vefält hast.
 - ii. Un du woascht vejäwen ea jana frajcht, wan hee/see sikj vefält haft.
- b. „Vedroacht eena dän aundren, un vejäft junt unjarenaunda, wan wää eene Kloag jäajen dän aundren haft. Soo aus de Har junt vejäft haft, soo mott jie uk vejäwen.“ Kolossa 3:13
 - i. Christus vejeft ons sea väl onen daut wie froagen.
 - ii. Hee haft daut aum Kjriez aul vejäft. Doawäajen saj wie, doo aul zemorjes vejäwen.
- c. Weetst du, woo väl mol du die veschulchst met een leefloosa Jedanken, ooda Jiez, ooda Lost?
- d. Un woo väl mol Jesus daut lat unja de Jnod wajch schwamen, onen daut du jeemols aundenkjst aun fa Vejäwunk froagen?
- e. Vejäw dien Poatna, soo aus Jesus die vejeft.

Christus vejeft ons sea väl onen daut wie froagen.

4. „Vejäwen meent Vetruen?“

- a. Em gaunzen, enne Ehe, mott wie ons omzajcht daut Vetruen schenkjen.
- b. Oba waut, wan dien Poatna en groote Dinj jefollen es, soowaut aus Ehebruch, Kjinja mesbrucken ooda Pornografie?
 - i. Vejäwen motst du, wan du west en frooet Läwen haben:
 - . „Vedroacht eena dän aundren, un vejäft junt unjarenaunda, wan wää eene Kloag jäajen dän aundren haft. Soo aus de Har junt vejäft haft, soo mott jie uk vejäwen.“ Kolossa 3:13
 - ii. Vetruen kaust du nich, wan dee sikj nich vetruensvoll vehelt.
 - . „Em Trubbel sikj opp eenen ontruen Mensch veloten, es soo aus eene schljachte Tän ooda een loma Foot.“ Spricha 25:19
 - iii. Dan woascht du doano seenen, daut hee de Kjinja nich to hoolen kjricht.
 - iv. Ooda du woascht am/ar loten wälen, aus hee/see die well, ooda dän aundren Poatna, oba du woascht am/ar nich loten met junt beid een Vehelt-nis haben.
- c. Vejäwen meent, du woascht wada proowen to vetruen.
 - i. Du woascht motten mea Vetruen schenkjen, aus du jleefst daut hee/see wieet es.
- d. To soon Poatna dee doa haft Vetruen jebroaken saj wie:
 - i. „Sie SEA derchsechtich to dien Poatna, toom halpen Vetruen opptobuen.
 - . Sie derchsechtja, aus du soo feelst daut needich es.
 - . Veleicht met dän App wua hee/see emma seenen kaun wua du best.
 - . Lot am/ar wellich en dien Foon rom blädren.
 - . Moak secha, daut hee/see dien password haft.
 - ii. Licht nemt de Diestaness de Krauft. De Soton well em Diestren sennen.
 - iii. Wan dien Poatna doa noch irjentwaut Vestoaknet feelt, jeit ommäajlich Vetruen opptobuen.
 - iv. Wan dien Poatna oba enwoat, daut du jeist ut dien Wajch rut, toom am/ar weeten loten waut aunjeit, dan jeit hausja Vetruen opptobuen, aus eena jleeft.“

Woo weet ekj aus ekj vejäft hab?

- a. Wenscht du, dien Poatna kjrielech daut mol to seenen, woo schljacht daut wia waut hee/see deed?
- b. Wenscht du, du kust am/ar daut trigjtolen?
- c. Faulen die leicht väl Dinj bie, waut dee orrajcht jedonen haft?
- d. Paust du noch opp, daut du dit nich vejäten woascht?

Wan du vejäft hast, dan hast du Gott daut jejäft, un du äwalatst Am daut gaunz. Du best reed, toom goodet denkjen von am/ar.

Waut passieet wan wie vejäwen?

1. „Doot nich rechten, dan woa jie uk nich jerecht woaren. Vedaumt aundre nich, dan woa jie uk nich vedaumt woaren. Vejäft, un junt woat vejäft woaren.“ Lukas 6:37
2. Wan wie leicht reed sent toom vejäwen, dan kaun ons Poatna uk leichta vejäwen.
3. Daut jeit sea scheen, wan dien Poatna leicht reed es, toom die Dinj äwaseenen.
4. Dan fang wie aun to sajen, „Daut Läwen jeit scheen äare Twee toop.“
5. Dan kjenn wie opphieren met bloos aundenkjen, woo de Trubbels to leesen.
6. Wie kjennen aurfangen eene scheene Reis toop to haben, ennestäd bloos aundenkjen aun daut Stia, de Plinkj Lichta, de Klotsch, un proowen mien Poatna tofräd to hoolen.
7. Daut es wua wie daut feelen, waut Liera 4:9 sajcht: „To twee sennen, es bätä aus auleen sennen; dee haben een Scheengonen en daut waut see doonen.“

Bemoakjungen:

Kjarpa

„Sie nich soo aus een Maun no däm irjent eene Fru komen kaun, soo aus no eenen Darpsborm. Hool aul diene Krauft fa diene ieejne Fru, un hab nich Jeschlachtsvekija met eene aundre. Sie jlekjlich met diene Fru, un hab aul diene Freid met dee, dee du die en diene Jugent frieen deetst. Straum un leeftolich aus een Ree, lot äa liebkoosen die jlekjlich moaken, lot ar met äare Leew om die sennen.“
Spricha 5:16-19

1. **Wan Sex enne Ehe rajcht jebrukt woat,**
 - a. Dan jeit daut scheen.
 - b. Daut binjt Lied toop soo aus sest nuscht.
 - c. Daut but Vetruen.
 - d. Daut but Leew.
 - e. Daut erfelt een Bederfnis en beid.
2. **Wan daut nich scheen jeit, ooda bloos eenem daut scheen jeit, dan es doa waut orrajcht.**
 - a. Waut sent de Dinj waut doa kjennen de Trubbel sennen?

Wie wellen dis Varzh uteneen plekjen, toom de Dinj bekjiken:

„De Maun saul de Fru daut jäwen, waut see een rajcht haft to kjrieen, un jrod soo goot uk de Fru däm Maun. De Fru äa Kjarpa jehieet nich bloos ar, oba uk äa Maun. Un jrod soo goot jehieet däm Maun sien Kjarpa nich bloos am, oba uk siene Fru. Trakjt junt nich eena vom aundren trigj, buta jie woaren junt beid doarenn eenich, opp eene bestemde Tiet, daut jie junt Tiet nämen toom bäden. Dan komt oba wada toop, daut Soton junt nich vesieekjen kaun, wiels jie junt nich beharschen kjennen.“ 1. Korinta 7:3-5

1. De Maun saul de Fru daut jäwen, waut see een Rajcht haft to kjrieen.

- a. Jeff ar: Frintlich behandlen besied Sex, uk met Sex toop.
 - i. Wan de Maun kaun Sex haben, dan es hee erfelt.
 - ii. De Fru well uk Sex, oba es mau dan erfelt, wan äa Maun ar leeftolich behaandelt derchem Dach.
 - iii. Wan daut nich passieet, dan es Sex bie ar eene Oppgow, ennestäd een erfeldet Scheengonen.
- b. Jeff ar: Orgasm
 - i. Orgasm es daut maklichstet Jefeel waut een Maun haft, wan hee Sex haft.
 - ii. De Maun sull doano seenen, daut de Fru uk daut Jefeel kjricht.
 - iii. Wäajen daut biem Maun jeweenlich hausja bat doa es, beläwen väle Frues dit Jefeel verhaupt kjeemol.
- c. Jeff ar: Perseenlichkheit (dignity, privacy, intimacy)
 - i. Fa eene Fru es Sex waut sea perseenlichet.
 - ii. See feelt sikj deep jeleeft, äa Maun aunvetrut, un sea secha bie äa Maun, wan hee sex haft met ar.
 - iii. Wan Sex oba ver de Ehe ooda besied de Ehe passieet, ooda äa Maun too op es ver siene Frind met wäa siene Fru es, dan gonen de Weedoag krakjt soo deep, aus daut Scheengonen von goodet Sex deit.

1. De Fru saul däm Maun daut jäwen, waut hee een Rajcht haft to kjrieen.

- a. Jeff am: Sex
 - i. Äwafia am. (seduce)
 - ii. Lua nich no am.
 - iii. Wan dien Kjarpa fa irjenteene Uasoak nich äwrich es, dan jeff am daut opp een aundra Wajch.
 - iv. Vesto, daut Sex meent Leew.
 - . Ekj wull dan ieescht räden.
 - . Väle Frues jeit daut soo aus dit.
 - . Ekj must vestonen, daut wia Leew.
- b. Jeff am: Een opnet Ua toom no siene Vesieekjungen to horchen.
 - i. Frei die fa dee Natua en am.
 - . Daut hee die soo jleicht.
 - . Daut Probleemen gonen to leesen met dien Kjarpa.
 - ii. Siene Vesieekjunk no aundre Frues haft nich met to doonen, daut du nich goot best.
 - . De goode Natua waut Gott am jejäft haft fa die, mott hee kontrollen, wan hee met aundre es, krakjt eendoont woo sea hee die leeft.
 - iii. Wan hee frie to die räden kaun, wan hee en Vesieekjunk kjemt, dan kaun hee dee leichta äwakomen.
 - . Soton siene Macht es em Diestren.
 - . Wan dien Maun daut mott stell hoolen, daut hee Vesieekjunk haft, dan

- mott hee em Diestren läwen, wua de Soton väl mea Macht haft.
 - . Wan hee kaun em Licht sennen doamet, tweschen junt beid, daut nemt dän Soton de Macht.
 - iv. Doatoo brukt daut, daut du een Selfstwieet hast.
 - . Vetru daut hee die leeft.
 - . Daut es wäajen dien Maun die leeft, daut hee to die doavon rät (nich wäajen hee die nich leeft).
- c. Jeff am huaga Respakjt.
 - i. Auleen daut hee to die doavon rät, moakt daut aul kloa, daut hee huaga Respakjt wieet es.
 - ii. Doamet bewiest hee, daut hee die well tru sennen un die leeft.
 - iii. Hee well nich, daut doa irjentwaut tweschen kjemt.

Vea Wäaj, woo du am kaust halpen, Vesieekjunk to äwakomen:

- 1. Op sennen, daut hee to die doavon räden kaun.**
- 2. Am en aules respakjten.**
 - a. Mana haben jesajcht, see sent jefollen, nich wäajen äant daut Sex soo sea jankad, oba wäajen dit wia eene Fru dee oppkjikjt no am, ennestäd raufkjikjt opp am.
 - b. Uk sien Sex Drief respakjten. Lot am weeten, daut daut waut goodet es, un daut du die doatoo freist.
 - c. Lot am niemols feelen, daut siene Vesieekjunk am domm ooda schwiensch moakt.
- 3. Väl mol Sex haben.**
- 4. Mootich Sex haben.**

De Fru äa Kjarpa jehieet nich bloos ar, oba uk äa Maun.

1. **Maun, wan äa Kjarpa diena es, waut hast du dan fa een diara Schauz.**
2. **Dis Kjarpa es nu diena, toom met spälen un utnutzen soo aus du west.**
 - a. Met jieda Jliet aun dien Kjarpa kaust du aun jieda Jliet aun äa Kjarpa naun.
 - b. Gott haft ar die aus een Jeschenkj jejäft.
 - c. Aus een Goaden, wua du met Scheengonen bennen spälen kaust.
 - d. Nutz ar ut met reine Leew.
 - e. Wautemma rein es (bloos tweschen junt beid) un en Leew es, daut es rajcht.
3. **Wan die daut jeemols enkjemt ar to mesbrucken, dan pauss opp.**
 - a. Du hast hia met dän Aulmajchtjen Gott Siene Dochta to doonen.
 - b. Un du bäta respakjt ar.
 - c. Pauss no ar opp.
 - d. Froag ar, woont maklich es, soo daut du ar daut jäwen kaust, waut see een Rajcht haft to kjrieen.
 - e. Froag ar, woont wee deit, daut du oppaussen kaust no ar.
 - i. Oppaussen, biem Sex haben.
 - ii. Bäd fa ar, daut see kaun jesunt sennen.
 - iii. Doktren, wan daut fält.
 - f. Froag ar, aus see too meed es, daut see nich bloos Sex kjricht, oba uk frintlich behandelt kjricht. Daut fält ar.
 - i. Wan see emma too meed es,
 - . Dan fält ar veleicht waut toom stoakjen.
 - . Dan fält ar veleicht daut du ar halpst.
 - . Dan fält ar veleicht ne Kjääkjsche.
 - ii. Wan see 'meed' aus ne Uträd brukt,
 - . Dan fält ar veleicht diene Leew noch aundasch to feelen, aus bloos em Sex.
 - . Dan fält ar veleicht Sex een Scheengonen to moaken fa ar, nich bloos fa die.
 - . Dan fält ar veleicht ennelje Heelunk, dee see bie Gott finjen kaun,
 - . Derch een Frint.
 - . Derch een Beroda.

4. **Fru, du hast dien Kjarpa opp Kjast no dien Maun jejäft, un hee haft nu een Rajcht to die. Daut es nich mea dien Rajcht nä to sajen.**
 - a. Ea jie junt befrieden, dan hautst du daut Rajcht.
 - b. Nu nich!
 - c. Hee brukt nich soo un soo goot sennen, toom daut hee Frieheit haft Sex to haben. Dien Kjarpa es siena.
 - d. Oppem Sofa schloopen es bloos een Spos. Nich dien Rajcht.

5. **Kaust du niemols nä sajen?**
 - a. Daut latste Poat von dis Varzh sajcht: Trakjt junt nich eena vom aundren trigj, buta jie woaren junt beid doarenn eenich.
 - b. Wan jie junt toop eenich sent, daut jie woaren vondoag nich, dan schauft daut.
 - c. Oba aufsajen sust du daut nich.
 - d. Wan du noch mol too meed best,
 - i. dan jeit waut to beräden.
 - e. Wan du meist emma too meed best,
 - i. Dan doo doa waut met.
 - . Eene Kjääkjsche aunnämen
 - . Waut brucken toom stoakjen
 - . Meddachs chop utnutzen
 - f. Wan du ‚meed‘ aus eene Uträd brukst,
 - i. Dan hia doamet opp.
 - ii. Daut Rajcht to dien Kjarpa hast du am jejäft, aus jie junt befrieden.

Un jrod soo goot jehieet däm Maun sien Kjarpa nich bloos am, oba uk siene Fru.

1. **Fru, wan sien Kjarpa diena es, waut hast du dan fa een diara Schauz.**
 - a. Nutzt dän ut un lotet scheen gonen.
 - b. Daut es dien Jeschenkj von Gott un von dien Maun.
 - c. Du kaust met jieda Jliet aun dien Kjarpa aun jieda Jliet aun sien Kjarpa naun.
 - d. Sex es een Goaden, dee Gott junt toop jejäft haft, toom doabennen spälen.

2. **Wan sien Kjarpa diena es, dan hast du nich bloos daut Väarajcht, du hast uk dee Veautwuatunk, am to erfellen.**
 - a. Moak secha, daut sien Kjarpa soo väl Sex kjrucht aus dän fält.
 - b. Wan du too väl mol too meed best, dan beoabeid die.
 - c. Wan hee too väl mol too meed es, dan sie soo sexy, daut hee sikj nich hoolen kaun.

- 3. Maun, du hast dien Kjarpa oppe Kjust no diene Fru jejäft, un see haft nu een Rajcht to die.**
- a. Daut es nich mea dien Rajcht auleen.

Trakjt junt nich eena vom aundren trigj.

- 1. Soo wiet aus wie weeten, sajcht de Bibel noanich, daut daut noch too vël woaren kaun.**
- a. De Bibel schift bloos no, daut Lied sellen vël Sex haben.
- 2. Buta jie woaren junt beid doarenn eenich opp eene bestemde Tiet.**
- a. Toom fausten
 - b. Dokta treatment
 - c. Irjent sestwaut
 - d. Jie woaren junt eenich
 - i. Siet op un vetalt doaräwa.
 - ii. Sie op un horch woo dien Poatna sikj feelt doaräwa.
 - iii. Sie wellich, die fa dien Poatna entostalen.
 - e. Dan komt oba wada toop, daut Soton junt nich vesieekjen kaun, wiels jie junt nich beharschen kjennen.
 - i. Habt vël mol Sex.
 - ii. Wacht nich too lang.
 - iii. Siet nich too leicht too meed.
 - iv. Uk wan jie beid junt nich doano feelen, strenjt junt aun.
 - v. Sex binjt toop.

**Wan daut en Leew es, un bloos tweschen junt beid,
dan lotet scheen gonen!**

Jesunde Seel

„Mien leewa Frint, ekj bäd doarom, daut et die en aules mucht goot gonen un daut du muchst jesunt sennen, soo aus die daut ennalich goot jeit.“
3. Johanes 1:2

Woo goot jeit die daut ennalich?

Wan diene Jesuntheit un diene Ehe un aulet Uteljet daut krakjt doano goot jeit, aus die daut ennalich goot jeit, woo goot es daut?

1. Waut es de Seel?

- a. Kjarpa
 - i. Waut du seenen kaust
 - ii. Waut die kaun wee doonen

2. Seel

- a. Waut nich to seenen es
- b. Ennelje Weedoag
 - i. Wan die wää schljachtet norät usw...

3. Waut moakt de Seel krank:

- a. Wan du feelst, daut wää die nich leeft
 - i. Wan Vetruen jebroaken woat
 - ii. Wan die mesbrukt woat

4. Wanea kunn de Seel sennen krank jeworden?

- a. Aus Bäbe
- b. Aus Kjint
- c. Enne School Joaren
- d. Enne Jugent von Frind (uk Novios)
- e. Bie Groot
- f. Von Famielje
- g. Vom Poatna
- h. Von de Kjoakj

5. Woosoo wudd ne Seel krank woaren?

- a. Wääjen wie nich dee Erkjantnis hauden, woo doamet om to gonen.
 - i. Wääjen wie nich vejeewen.
 - ii. Wääjen wie aunftungen de Lääjes to jleewen, de ons doaderch wort en-jebilt.

6. Waut brukt daut, toom seelisch jesunt woaren?

- a. Vejäwen
- b. Lääjes met Woarheit vetuschen

Bloos de Woarheit kaun frie moaken.

„Doawääjen, wan de Sän junt frie moakt, sent jie werkjlich frie.“ Johanes 8:36

Tieekjens, daut die Heelunk fält:

1. Wutt

- a. Dit kjemt väl mol, wan du wäm noch nich vejäft hast.
- b. Froag Jesus, die to wiesen.
 - i. Entscheid die, to vejäwen.
 - . Vejäwen meent, daut eefach en Gott Siene Henj to jäwen, em vollen Vetruen, daut Hee Sikj doaraun kjemren woat, un dan kaust du vejäten doavon un wada leewen.
 - ii. Lot Jesus die heelen.
 - . Heelen kaun Tiet nämen.

Wan du de Woarheit erkjanst, dan moakt de Woarheit die frie.

Hia sent waut Woarheiten:

„Doot niemols Rach eewen, leewe Frind. Jäft Gott Sienen Oaja Rum doatoo; wiels daut steit jeschräwen: „Rach eewen es Miene Sach. Ekj woa trigjtolen, sajcht de Har.““ Reema 12:19

„Siet leewa von Hoaten leeftolich eena toom aundren. Vejäft junt unjarenaunda, soo aus Gott junt en Jesus Christus aules vejäft haft.“ Efeesa 4:32

„June Radunk sat junt opp aus eenen Hoot, un Gott Sien Wuat aus een Schwieet, daut de Jeist junt jeft.“ Efeesa 6:17

2. Du kaust die nich leewen loten

- a. Dit kjemt jeweenlich doavon hää, daut du dieselbst nich leefst ooda von daut du nich weetst woo sea Gott die leeft.
 - i. Wäajen woo dien Voda wia..
 - ii. Wäajen waut Menschen jesajcht haben.
 - iii. Wäajen Lääjes, dee de Diewel die enjebilt haft.
 - iv. Wäajen du nich Tiet nemst, Gott kjanen to lieren.
- b. Froag Jesus, woont de Lääjes sent, dee du jeleeft hast.
- c. Sieekj die de Woarheit, dee de Bibel die jeft. Dan saj dee soo vål mol äwa, bat de Woarheit die frie moakt.
- d. Näm aule Dach Tiet, die von Gott leewen to loten.
 - i. Dan woascht du enwoaren, woo vål wieet du best un daut woat dien Poatna de Jelääjenheit jäwen, die to leewen.
 - ii. Du woascht uk enwoaren, woo vål wieet dien Poatna es, un du woascht am/ar uk bätä leewen kjennen.

**Wan du de Woarheit erkjanst, dan moakt de Woarheit die frie.
Hia sent waut Woarheiten:**

„Wiels Du hast mie gaunz un goa em Muttalief jeformt. Ekj dank Die, daut ekj wundaboa jemoakt sie; Diene Woakjen sent wundaboa, daut weet miene Seel sea goot. Miene Jestault wia fa Die nich vestoaken, aus ekj em Jeheemen jemoakt wort, wua mie kjeen Uag seenen kunn. Diene Uagen sagen mie ea ekj jebuaren wia. Miene Doag, dee noch komen sullen, wieren aula en Dien Buak jeschräwen, ea dee doa wieren.“ Psalmen 139:13-16 (Läs dän gaunzen Psalm.)

3. Du kaust nich vetruen

- a. Dit kjemt von wan Vetruen jebroaken es,
 - i. Von diene Elren.
 - ii. Von diene Frind.
 - iii. Von dien Poatna.
 - iv. Veleicht soogo von Gott.
 - v. Veleicht von soo vål Menschen, daut du m.et eemol jesajcht hast, “Kjeen-em jeit to vetruen. Ekj woa niemols mea wäm vetruen”.
- b. Kjeene Ehe kaun scheen sennen, wan doa nich Vetruen es.
 - i. Wan Vetruen jebroaken es,
 - . Dan kaust du nich vetruen.
 - . „Em Trubbel sikj opp eenen ontruen Mensch veloten, es soo aus eene schlaachte Tän ooda een loma Foot.“ Spricha 25:19

- c. Wan Busse passieet es,
 - i. Dan proow wada to vetruen.
- d. Toom daut eene Ehe woat scheen sennen, mott mea Vetruen jeschonken aus jana wieet es.

**Wan du de Woarheit erkjanst, dan moakt de Woarheit die frie.
Hia sent waut Woarheiten:**

„Leew vedrajcht aules, see jleeft aules, see hopt aules, jeduldich drajcht see aules.“ 1. Korinta 13:7

„Doawäajen, schmiet jun vetruen nich wajch, daut woat junt noch emol rikjlich beloont woaren.“ Hebräa 10:35

4. Du kaust nich roaren

- a. Dit kaun von Jebungenheiten komen, dee du dieselfst vääjenomen hast:
 - i. „Ekj woa niemols mea.“
 - . Met dit moakst du dien Hoat hoat.
 - . Bräakj daut Vespräakjen to dieselfst.
- b. Froag Jesus no de Woarheit, dee die woat frie moaken.

**Wan du de Woarheit erkjanst, dan moakt de Woarheit die frie.
Hia sent waut Woarheiten:**

„Rät junt unjarenaunda aule Dach Moot too, soolang aus daut noch “vondoag” heet, daut sikj von junt kjeena derch de aunschmäarende Sind hoat moaken lat.“ Hebräa 3:13

„Soo aus jesajcht es: “Vondoag, wan jie Siene Stemm hieren, dan vehoat june Hoaten nich, soo aus don, aus see Mie vesochten.”“ Hebräa 3:15

„Hee haft an de Uagen veblent un de Hoaten hoat jemoakt, daut see met de Uagen nich seenen un met de Hoaten nich vestonen, daut see sikj nich bekjieren, un ekj an dan heelen wudd.“ Johanes 12:40

5. Du kaust nich batem Orgasm komen

- a. Dit kjemt väl mol wan du sexuel waut beläft hast, waut diene Seel haft krank jemoakt.
- b. Daut kaun komen, wan dien Voda die mesbrukt haft, ooda haft die opp intieme Städen aunjefot, ooda haft Wieed jesajcht, dee sikj die jriess feelden.
 - i. Ooda irjent eene aundre Persoon
 - ii. Novio
 - iii. Soogoa dee Novio waut nu dien Maun es
- c. Daut kaun uk komen von waut Relijion ons jeliheet haft, „Dit’s orrajcht.“
 - i. Läs „Daut Leet“.
 - . Aules es rajcht, soo lang aus,
 - . Daut en Leew es.
 - . Daut bloos tweschen junt beid es.
- d. Froag Jesus, woont de Lääjes es, dee du jleefst, wuawääjen du kjeen Scheen-gonen em Sex hast.

**Wan du de Woarheit erkjanst, dan moakt de Woarheit die frie.
Hia sent waut Woarheiten:**

„Wan wie onse Sinden bekjanen, dan es Hee tru un jerajcht, un vejeft ons de Sinden un reinicht ons von aule Ojjerajchtichkjeit.“ 1. Johanes 1:9

„Doawääjen, wan de Sän junt frie moakt, sent jie werkjlich frie.“ Johanes 8:36

„Ekj dank Die, daut ekj wundaboa jemoakt sie; Diene Woakjen sent wundaboa, daut weet miene Seel sea goot.“ Psalmen 139:14

Jesus well die heelen!

1. Bloos Jesus kaun heelen.

- a. Vetal Jesus krakjt en Eenzelheiten, woo die daut doa jinkj.
- b. Froag Am, aus du doa Schult aun wiescht;
 - i. Wan du doa orrajcht deetst, bekjan diene Sind.
 - ii. Wan nich, dan lot Soton die kjeemol mea vedaumen doamet.
- c. Saj Jesus, woo du die feelst äwa dee Persoon, waut die daut aundeed.
 - i. Wan du uk weetst, daut diene Jefeelen to janem nich rajcht sent, saj Jesus dan noch krakjt woo du die feelst.
 - ii. Froag Am, woone Jefeelen rajcht sent un woone nich.
 - . Wan jana die haft orrajcht jedonen, dan es daut gaunz rajcht, wan du soo feelst daut hee deed orrajcht. De Bibel sajcht, wie sellen kjeemol orrajcht rajcht nanen.
 - . Wan du noch doll best äwa janem, daut es orrajcht von die.
 - . Daut es dan nich janem siene Sind. Daut es dan diene Sind.
- d. Vejeff janem.
 - i. Jeff daut Gaunze en Jesus Siene Henj.
 - ii. „Doot niemols Rach eewen, leewe Frind. Jäft Gott Sienen Oaja Rum do-
atoo; wiels daut steit jeschräwen: “Rach eewen es Miene Sach. Ekj woa
trigjtolen, sajcht de Har.”“ Reema 12:19
 - iii. Moak diene Fusten op un lot am/ar loos.
 - iv. Vejäwen meent nich, daut hee/see rajcht jedonen haft. Daut meent, du
latst daut bloos gaunz loos un vetrust Jesus, daut Hee Sikj doamet weet-
en woat.
- e. Froag Jesus, diene Seel to heelen.
- f. Hool die doafäa!
- g. Vetrü Am, daut Hee die jeheelt haft.
 - i. “Un wan wie weeten, daut Hee ons hieet wan wie om waut froagen, dan
weet wie uk, daut wie daut haben, om waut wie bäden.” 1.Johanes 5:15
- h. Bruck dien Schwieet.
 - i. Soton fangt jeeenlich met vedaumen aun.
 - ii. „June Radunk sat junt opp aus eenen Hoot, un Gott Sien Wuat aus een
Schwieet, daut de Jeist junt jeft.“ Efeesa 6:17

„Eene kranke Seel moakt dien Kjarpa uk krank.“

Daut Ieeschte

„Dan woa jie weeten waut Woarheit es, un de Woarheit woat junt frie moaken.“
Johanes 8:32

Mien Poatna Aus Wichtichstet

„Doawääjen jeit een Maun von siene Elren wajch, un veeenicht sikj met siene Fru,
un see sent eent.“ 1. Mose 2:24

Gott sull daut gaunz ieeschte sennen en ons Läwen, un daut näakjst wichtichste
sull ons Poatna sennen.

**„De Ehe es sea scheen, wan beid Poatnasch äa Poatna em Hoat aus Numma 1
hoolen. Wan nich, daut kaun de Ehe sea schwoa moaken.“**

Doa es ne Aufgonst, dee Gott en ons nenjebut haft. Aufgonst hieet sikj no waut
schlajchtet, un daut kaun uk waut schlajchtet sennen. Doa es oba ne Aufgonst,
dee goot es. Josua 24:19 rät von ons aufjenstja Gott.

Woo schauft dise goode Aufgonst enne Ehe?

1. Aus Gott de Ehe muak, muak Hee dee soo, daut dee Poatna de ieeschte Städ
sull haben en dän Poatna sien Hoat. Wan een Poatna opp eemol feelt, daut ses-
twaut de ieeschte Städ en sien Poatna sien Hoat haft, dan woat dee aufjenstich;
un met Rajcht.
 - a. Denkj aun woo eene Fru sikj feelt, wan see enwoat, daut äa Maun noch eene
aundre Fru haft. Daut oajat ar sea; un daut sull ar oajren. Dee Städ es äare.
2. Aundre Dinj, de doa kjennen de ieeschte Städ nämen, ennestäd dän Poatna.
 - a. Elren
 - i. „Doawääjen jeit een Maun von siene Elren wajch, un veeenicht sikj met
siene Fru, un see sent eent.“ 1. Mose 2:24
 - ii. Elren sullen dit uk vestonen un respaktieren.
 - b. Kjinja
 - i. Kjinja brucken väl Tiet von äare Elren, besondasch von de Mame.
 - ii. Kjinja waussen aum jesuntsten opp, wan see weeten, daut äare Mame un
äare Pape to sikj unjarenaunda wichtja sent, aus see sent.
 - iii. Elren sullen sikj eenich sennen, met woo see de Kjinja toop opptrakjen
wellen. Daut woat väl Tiet von äant beid nämen. See sellen daut oba beid

em Denkj hoolen, daut see uk wellen Tiet haben fa bloos sikj auleen.

- . Noch mol dee Kjinja wajch brinjen, toom Tiet auleen haben.
- . Dee Kjinja tiedich to schlop brinjen un dee Tiet utnutzen, toom auleen met dien Poatna toop sennen.

c. Jelt

- i. Oabeit es wichtich, oba lot ar feelen, daut see dän ieeschten Plauz haft.
 - . Vetalt junt unjarenaunda äwa waut jie aum Dach doonen. Daut woat jun Poatna soo feelen moaken, aus see sent doa uk met vewekjelt.

d. Foon ooda TV

- i. Daut Foon es nich schlajcht. Bruck daut soo aus die daut fält, oba vejät nich, daut dien Poatna de ieeschte Städ jehieet. Dien Poatna mott daut feelen, daut hee/see die soo wichtich es, daut du meteemol noch kaust daut Foon auntsied lajen, bloos toom mol vetalen un horchen.
 - . Daut Foon es soont, waut Mana un Frues beid faustnemt. Lot daut niemols dien Poatna siene Städ nämen.

e. Kjoakj

- i. Gott sull wichtja sennen, oba nich de Kjoakj.
 - . De Ehe es de Grunt von aul daut äwaje. Wan de Ehe stoakj es, dan kaun de Famielje stoakj sennen. Wan de Famielje stoakj es, dan kaun de Kjoakj stoakj sennen. Doawäajen hool dien Poatna aum ieeschten Plauz; ea aus de Kjoakj.

f. Frind

- i. Habt Frind toop. De Maun sull uk Mauns Frind haben un de Fru sull Frues Frind haben. Lot oba emma dän Poatna weeten, daut dee wichtja es aus de Frind.

g. Aundre Dinj

- i. Dien Foatich
- ii. Diene Neimaschien
- iii. Dien Hunt
- iv. Dien Hus
- v. Dien Deenst
 - . Dien wichtichsta Deenst fa Gott es daut ieeschte dien Poatna; dan diene Famielje; un dan aundre Menschen.

Help Von Gott

“Een Leet opp de Reis no Jerusalem to sinjen. Ekj häw miene Uagen opp un kjikj no de Boaj. Von wua kjemt miene Help? Miene Help kjemt vom Harn, Dee Himmel un leed jemoakt haft.“ Psalmen 121:1-2

1. Leew

- a. Wan du aules vejatst, behool Leew
- b. Leew dakjt aules
- c. Leew brinjst Respakjt
- d. Leew well deenen
- e. Leew denkt aun dän aundren
- f. Leew lacht
- g. Leew moakt daut scheen gonen
- h. Eendoont waut vonne Problemeen jie auntrafen en june Ehe, näm die vää, daut DU woascht dien Poatna leewen.
- i. LEEW

2. Waut wan du nich jenuach Leew hast?

- a. Du kaust nich jäwen waut du nich hast.
- b. Go oba nich no dien Poatna fa Leew!!!
- c. Dien Poatna kaun die nich erfellen!
- d. Wan wie ons nich jeleeft feelen, dan bu wie Wenj opp, rom ons Hoat.
- e. Gott haft ons soo jemoakt, daut ons daut aun Leew fält.
- f. Veacht, wietloos, enjestopt mank onse Wenj, kjrieselt daut bojauf.

3. Go no Gott!!!

- a. Lot Am die leewen.
- b. Dan rieekj de Leew bedinjungsloos wieda aun dien Poatna.

4. Waut es en dien Hoat?

- a. „Wuarom nan jie Mie Har, Har, un doonen doch nich, waut Ekj junt saj? Een gooda Mensch woat ut daut goode en sien Hoat, goodet verendach brinjen; un een schljachta Mensch brinjst von daut schljachte en sien Hoat, schljachtet verendach. Wiels wuavon daut Hoat voll es, rät daut Mul.“ Lukas 6:45-46
- b. Waut en die es, woat rut komen.
- c. Schauf aun dieselfst, daut du dien Poatna woascht een scheenet Jeroch senen.
- d. Wua du äwa nodenkjst, felt dien Hoat.
- e. Wan Gott Siene Leew dien Hoat felt, dan woat dee Leew ut dien Hoat rut-komen.

Deenen

„Mank junt oba saul daut nich soo sennen. Wää mank junt groot sennen well, mott sikj eewen dän näakjsten sien Kjnajcht to sennen; wää bie junt de jrats-ta sennen well, mott aulemauns Deena sennen. Wiels de Menschensän kjeem uk nich Sikj bedeenen to loten, oba to deenen un Sien Läwen hantojäwen, vüle loostokjeepen.“ Matäus 20:26-28

1. Woo sit dit enne Ehe?

- Wie sullen seenen dän aundren to deenen, ennestäd wachten, de aundra sull mie deenen.

2. Eene Ehe sull nich mau 50/50 sennen. De sull 100/100 sennen.

- Daut meent, enne Ehe es daut emma bat mie, dän aundren Goodet to doonen un Leew to bewiesen. Soo schwind aus ekj daut velang, daut daut nu bat dän aundren es, dan bumst daut. Ekj mott wellich sennen, 100% vonne Tiet Leew to bewiesen. Wan du uk soo feelst von dieselfst, dan fot sikj daut fein toop; un daut moakt de Ehe sea scheen.

3. Waut wan wie wudden opphieren met no ons unjarenaunda kjikjen, un aunfangen toop, Sied bie Sied, aundre to deenen?

- Wie woaren ons unjarenaunda aunfangen to freien fa onse Veschiedenheiten.
- Daut woat eene jratre Leew jäwen fa aundre Menschen.
- Daut woat ons stoakja vebinjen.

4. Wan Gott sajcht, wie sent eent, dan sull wie ons uk aus eent aunnämen.

- Poatna aun een Läwen
- Poatna aun een Droom
- Poatna aun een Ziel

5. Waut meen wie met „toop“?

- Ons unjarenaunda Dinj vetalen,
 - Von onse Oabeit.
 - Von onse Kjinja.
 - Von woo ons daut jeit.
 - Von waut wie lieren.
 - Von waut wie dreemen to doonen.
- Ons eenich sennen en ons Ziel.
- Horchen, daut wie vestonen kjennen, woo ons Poatna denkjt un woo hee/see sikj feelt.



David un Marlene lieeden sikj enne 1990 kjanen, befriedren sikj enne 1994, un haben 5 Kjinja toop. En äare 29 Joa haben see en Canada, en Bolivia, un en Mexico jewont. See haben vël scheene Tieden toop jehaut. Se sent uk toop derch schwoare Tieden jegonen. See äare dree: Gott, David, un Marlene sent derch de Joaren emma dichta-toop jekomen. See haben eene scheene Ehe.

Eene scheene Ehe es Gott sien Plon fa jieda Poa Ehelied. Dit scheene kjemt oba nich onen Oabeit; soo goot aus eene goode Foarma Arnt niemols onen Oabeit kjemt. Trubbel kjemt wan wie nich weeten waut wie doonen sellen met de Ehe, toom daut eene scheene Ehe moaken. Dise Klaussen sent jemoakt toom veschiedne Dinj openboaren waut junt kjennen halpen de Ehe to vebätren.

“Dan woa jie weeten waut Woarheit es, un de Woarheit woat junt frie moaken”. Johanes 8:32